

Immikkut akileraarummik taamaallaat Kalaallit Nunaanni Ilagiinni ilaasortanit akilerneqartartussamik eqqusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut

(Inatsisartunut ilaasortaq Randi Vestergaard Evaldsen, Demokraatit)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Siullermeerinnineq

Naalakkersuisut Inatsisartut aalajangiiffigisassaattut siunnersuut manna qujassutigaaq, Naalakkersuisut peqquneqarnissaannik immikkut ilagiinni ilaasortanit akilerneqartartussamik ilagiinnut akileraarummik eqqussisoqarnissaa pillugu.

Inatsisartut siusinnerusukkut oqaluuserisassaq taanna 2017-imi ukiakkut ataatsimiinnermi oqaluuserereersimavaat, soorluli tamanna siunnersuuteqartup tikkuaraa.

Naalakkersuisut aammaarlutik oqaatigiumavaat nunatsinni Kalaallit Nunaanni Ilagiinnik aningaasalersuinermik aaqqissuussinerput inatsisini tunngaviusuni § 68-imut uniuuttuunngitsoq, tassani sammineqarmat qanoq upperisaqarsinnaanermut kiffaangissuseqarneq, tassami immikkut ilagiinnut akileraarummik akiliisanngilagut, taamaasillutalu inuttut ataasiakkaatut immikkut nunatsinni ilagiinnut akiliuteqartarata.

Soorluli siunnersuuteqartup tikkuaraa Naalakkersuisut siusinnerusukkut ilisimatitsissutiginikuuat akileraartarnermi periarfissaasoq immikkut ilagiinnut akileraarummik eqqussisoqarsinnaanera. Tamannali inatsisitigut aalajangersakkamik tunngavissamik aallaaveqartariaqarpoq, kiisalu pisariaqartinneqassallutik IT-mik aaqqissuussinermi ineriartortitsinissamat atortut, atortorissaarutillu atuutiinnarsinnaanerannut aningaasartuutissat, immikkut ilagiinnut akileraarummik akiliuteqartarnissamik sullissisuusinnaasut, maanna akileraartarnikkut aaqqissuussinerput tamatumunnga piareersagaangimmat. Ilanngullugulu naatsorsuutigisariaqassaaq annertusisamik nukinnik atuisoqartariaqassasoq, atortuulersitsinermut aammalu allaffissornermut, taakkunanami suliassanik ingerlatsisoqarnissaa pisariaqartinneqassammat.

Soorlu siusinnerusukkut ilisimatitsissutigineqareersoq Kalaallit Nunaanni Ilagiit suliassanik arlaqartunik upperisamat attuumassuteqanngitsunik Namminersorlutik Oqartussanut aamma kommuninut tunngasunik suliaqartarput. Kalaallit Nunaanni Ilagiit ilaatigut isumagisaraat inuunnaat nalunaarsorneqartarneri aamma toqusunik ilisisarneq. Siunnersuuteqartullu siunertarisimappagu immikkut qularnaassallugit upperisap aamma upperisarsiornerup immikkut inuit namminerisamik isumagisarilissagaat, ilagiinnut akileraarummik eqqussinikkut, qularnaarineq taamaattoq piumasaqaatitaqassaaq allaffissornikkut sulianik

allamut inissinissamik, ullumikkut Kalaallit Nunaanni Ilagiinnit suliarineqartartunik. Siusinnerusukkut ilisimatitsissutigineqarnikuvoq Naalakkersuisut susassaqtut naleqquttut suleqatigalugit suleqatigiissitamik pilersitsiniartut, ersarinnerusumik periarfissanik misissuisussanik, suleqatigiissitamillu pineqartutut sulii Naalakkersuisut pilersitsissamaarput.

Naalakkersuisullu tamatuma ilutigisaanik siunnersuuteqartumut ammaffigivaat ilagiinnut akileraarutip akileraartarnikkut iluarsaaqqinnissami aggersumi oqaluuserisassanut ilanngunnissaa, suliaasarlu taanna taamaasilluni suleqatigiissitap pineqartup suliaasaanut ataqatigiissaarneqarsinnaavoq nalilersugassasut, qanoq pineqartut suliaasat upperisamut attuumassuteqaangitsut siunissami isumagineqarsinnaaneri eqqarsaatigalugit.

Tamannalu innersuullugu Naalakkersuisut pissusissamisoortinngilaat piffissami matumani immikkut isummorsorfigissallugu ilagiinnut akileraarummik eqqussisoqassanersoq, tamatumani akileraartarnikkut aaqqussusseqqinnissamik suliat utaqqimaarneqartariaqarmata, tamatumani suleqatigiissitap inassuteqaatigiumaagai.

Tamannalu tunngavigalugu Naalakkersuisut inassutigaat siunnersuut itigartinneqassasoq.